

ԱՎԱԳ ՇԱԲԱԹԸ ՄԱՅՐ ԱԹՈՌ Ս. ԷԶՄԻԱԾՆՈՒՄ

Ավագ Շաբաթվա սկիզբն ազդարարում է Ծաղկազարդի կիրակին՝ խորհրդանշելով Հիսուս Քրիստոսի մուտքը Երուսաղեմ:

Ապրիլի 9-ին Ծաղկազարդի տոնն առանձնահատուկ կերպով նշվեց Մայր Աթոռ Սուրբ Էջմիածնում:

Առավոտյան կատարվեց հանդիսավոր ժամերգություն, որի ավարտին Մայր Տաճարի առջև, հանդիսապետությամբ Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսի և ներկայությամբ հայրուրավոր հայորդիների, կատարվեց անդաստանի՝ աշխարհի չորս կողմերի օրհնության արարողություն: Անդաստանի ընթացքում օրհնվեցին նաև ուռենու ճյուղերը, ապա բաժանվեցին հավատացյալ ժողովրդին:

Միաձուլված Սուրբ Տաճարում մատուցվեց Ս. Պատարագ: Պատարագիցն էր Մայր Աթոռ Սուրբ Էջմիածնի միաբան Հոգեշնորհ Ս. Վազգեն արեղա Նանյանը:

Ծաղկազարդի օրը Ն.Ս.Օ.Տ.Տ. Գարեգին Բ Ամենայն Հայոց Կաթողիկոսի բարձր տնօրինությամբ հոջակված է որպես մանուկների օրհնության օր: Այս առիթով հավարտ Ս. Պատարագի Իջման Ս. Սեդանի առջև Նորին Սրբության առաջնորդությամբ կատարվեց մանուկների օրհնության կարգ:

Նույն օրը, Պատարագի սրբազան արարողությունից հետո, Վեհաբանի հարկի ներքո, Վեհափառ Հայրապետն ընդունեց Վաղարշապատ քաղաքի շուրջ 150 մանուկների՝ քաղաքապետ Գագիկ Ավագյանի և քաղաքային իշխանությունների ներկայացուցիչների ուղեկցությամբ: Նորին Սրբությունը շնորհավորեց ներկաներին իրենց համար հիշարժան այդ օրվա առիթով՝ Հայրապետական իր օրհնությունը, հայրական պատգամն ու բարեմաղթանքները հղելով խանդավառ մանուկներին: Հանդիպման ավարտին մանուկներին հանձնվեցին նվերներ:

Նույն օրը Վեհաբանում Ամենայն Հայոց Կաթողիկոսն ընդունեց նաև Հայաստանում գտնվող Լոս Անջելեսի Շամյան վարժարանի սաներին և մանկավարժներին:

Ավագ Երկուշաբթին խորհրդանշում է Արարչագործությունը, հիշատակվում է նաև Անպտուղ թզենու առակն ու Երուսաղեմի Տաճարի մաքրագործումը: Մայր Տաճարում առավոտյան և երեկոյան ժամերգությունների ընթացքում Ս. Գրային ընթերցումները հիշատակում էին Հիսուս Քրիստոսի այս ուսուցումները՝ անպտուղ կյանքով չապրելու պատգամով:

Ավագ Երեքշաբթի հիշատակվում է Տասը կույսերի առակը՝ համաձայն Ավետարանական պատգամի, թե՛ *«Արթո՛ւն կացեք, որովհետև չգիտեք ո՛չ օրը և ո՛չ էլ ժամը»* (Մատթ. ԻԵ 13):

Ընդունված կարգով Ավագ Երեքշաբթի, երեկոյան ժամերգության ընթացքում, Մայր Տաճարի ատյան դուրս եկան տասը մանուկներ՝ խորհրդանշելով տասը

կույսերին: Ձեռքերին ունենալով մոմեր՝ հինգը վառվող, հինգը՝ հանգած, մանուկները խորհրդանշում են հինգ իմաստուն և հինգ հիմար կույսերին:

Ավագ Չորեքշաբթի հիշատակվում է Բեթանիայում մեղավոր կնոջ կողմից թանկագին յուղով Հիսուսի օծման պատմությունը՝ որպես խորհրդանշիչ Քրիստոսի խաչելության ու մոտավոր մահվան: Այս օրը խորհրդանշում է նաև Հիսուսի մատնությունը:

Ավագ Հինգշաբթի խորհրդանշում է վերջին ընթրիքը՝ որպես Ս. Հաղորդության խորհրդի հաստատում, և Ոսնկվան՝ որպես սիրո և խոնարհաբար ծառայելու Տերունավանդ օրինակ:

Ավագ Հինգշաբթիին սկսվեցին Ավագ Շաբաթվա հիմնական արարողությունները, որոնք խորհրդանշում են մեր Տիրոջ՝ Հիսուս Քրիստոսի վերջին ընթրիքը, Քրիստոսի կողմից իր աշակերտների ոտքերի լվացումը և Ս. Հաղորդության խորհրդի հաստատումը:

Առավոտյան Մայր Տաճարում, ի հիշատակ Հիսուս Քրիստոսի վերջին ընթրիքի և Հաղորդության խորհրդի հաստատման, մատուցվեց Ս. Պատարագ: Սրբազան արարողության ընթացքում հաղորդություն ստացան բազմաթիվ հավատացյալներ: Պատարագիչն էր Ս. Մխիթար աբեղա Գրիգորյանը:

Հետմիջօրեին ձեռամբ Ն.Ս.Օ.Տ.Տ. Գարեգին Բ Ծայրագույն Պատրիարքի և Ամենայն Հայոց Կաթողիկոսի կատարվեց Ոսնկվայի արարողությունը: Սուրբգրային ընթերցումներից հետո Վեհափառ Հայրապետը խաչով ու Ավետարանով օրհնեց յուղը:

Ապա, Տիրոջ օրինակով, լվաց և յուղով օծեց 12 հոգու ոտքերը: Արարողությունից հետո հավատացյալներին բաժանվեց օրհնված յուղ: Ընդունված ավանդույթով, հավատացյալներն այն գործածում են հիվանդությունների ժամանակ կամ խառնում են տանն ունեցած յուղին:

Ավագ Հինգշաբթի, Խավարման գիշերը, ժամը 19:00-ից մինչև ուշ գիշեր կատարվեց Հիսուս Քրիստոսի չարչարանաց և խաչելության կարգը: Հընթացս արարողության քարոզ խոսեց Ս. Ասողիկ եպիսկոպոս Արիստակեսյանը (տե՛ս էջ 31):

Ավագ Ուրբաթը Տիրոջ խաչելության և թաղման խորհուրդն ունի: Կեսօրին Մայր Տաճարում կատարվեց խաչելության կարգ, իսկ երեկոյան, Ամենայն Հայոց Հայրապետի հանդիսապետությամբ, կատարվեց Թաղման կարգ: Այս արարողության ընթացքում Հիսուս Քրիստոսի խորհրդանշական գերեզմանը, զարդարված ծաղիկներով, դուրս բերվեց Մայր Տաճարից և հանդիսավոր թափոքով պտտեցվեց Մայր Տաճարի շուրջը:

Ավագ Շաբաթը խորհրդանշում է Դժոխքի ավերումը:

Երեկոյան Մայր Տաճարում մատուցվեց Ճրագալույցի Ս. Պատարագ, որի ընթացքում տրվեց Քրիստոսի Հարության ավետիսը և ավարտվեց Մեծ պահքը: Պատարագիչն էր Ս. Փառեն եպիսկոպոս Ավետիքյանը:

Հավարտ Ս. Պատարագի եկեղեցական թափոքը շարժվեց Վեհարան, ուր Նորին Սրբության հանդիսապետությամբ կատարվեց Տնօրինների արարողություն:

Կիրակի, ապրիլի 16-ին, Հիսուս Քրիստոսի Հարության տոնն էր:

Աշխարհասփյուռ Հայաստանյայց Առաքելական Սուրբ Եկեղեցին այսօր տոնախմբեց մեր Տեր և Փրկիչ Հիսուս Քրիստոսի հրաշափառ Հարության տոնը:

Առանձնահատուկ շուքով և ցնծությամբ Սուրբ Հարության տոնը նշվեց համայն հայ ժողովրդի հոգևոր կենտրոն Մայր Աթոռ Ս. Էջմիածնում:

Տոնի առիթով օրհնությամբ Ն.Ս.Օ.Տ.Տ. Գարեգին Բ Ամենայն Հայոց Կաթողիկոսի կազմակերպվել էր թափոր-երթ: Վաղ առավոտյան, Սուրբ Հռիփսիմե վանքի մոտից, Մայր Աթոռ Սուրբ Էջմիածնի և ՀԲԸՄ-ի հայորդյաց տների սաների առաջնորդությամբ հարյուրավոր երիտասարդներ շարականների երգեցողության և թմբուկների ձայների ներքո շարժվեցին դեպի Միածնաէջ Սուրբ տաճար, ուր դիմավորեցին Հայրապետական թափորը:


Առավոտյան ժամը 10.30-ին Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսը, իր օրհնությունները բաշխելով խուռներամ հավատացյալ ժողովրդին, հոգևորականների մեծահանդես թափորով ուղղվեց դեպի Մայր Տաճար, ուր մատուցեց Սուրբ և Անմահ Պատարագ և Տիրոջ Սուրբ Հարության տոնի առիթով Հայրապետական իր պատգամը հղեց համայն հայ ժողովրդին (տե՛ս էջ 3):

Հայրապետական Սուրբ Պատարագին ներկա էին ՀՀ Նախագահ Ռոբերտ Քոչարյանը, ՀՀ վարչապետ Անդրանիկ Մարգարյանը, ՀՀ Սահմանադրական դատարանի նախագահ Գագիկ Հարությունյանը, նախարարներ, ԱԺ պատգամավորներ, Հայաստանում հավատարմագրված դիվանագետներ, Հայաստանում գործող միջազգային կազմակերպությունների ներկայացուցիչներ, Գերագույն Հոգևոր Խորհրդի անդամներ, գիտության, կրթության, արվեստի և մշակույթի գործիչներ:


Սուրբ Պատարագի ավարտին Վեհարանի հանդիսությունների սրահում տեղի ունեցավ պաշտոնական ընդունելություն, որի ընթացքում Ամենայն Հայոց Կաթողիկոսն ամենքին վերստին ուղղեց Հայրապետական իր շնորհավորանքն ու բարեմաղթանքները Քրիստոսի Հրաշափառ Հարության տոնի առիթով:

Սուրբ Պատարագի ավարտին, Ս. Տրդատի բաց խորանի առջև, Հայորդյաց տների շնորհալի սաները հանդես եկան համերգային ծրագրով:


**Քրիստոս յարեաւ ի մեռելոց
Օրհնեալ է Յարութիւնը Քրիստոսի**



ՁԵՌԱՄԲ ՀԱՅՈՑ ՀԱՅՐԱՊԵՏԻ Ս. ԷԶՄԻԱՇՆԻ ՄԱՅՐ ՏԱԾԱՐՈՒՄ
ԿԱՏԱՐՎՈՒՄ ԵՆ ԱՎԱԳ ՀԻՆԳՇԱԲԹԻ ՅՈՒՂԻ
ՕՐՀՆՈՒԹՅԱՆ ԵՎ ՈՏՆԼՎԱՅԻ ԱՐԱՐՈՂՈՒԹՅՈՒՆՆԵՐԸ



ԳԱՐԵԳԻՆ Բ ՎԵՀԱՓԱՌ ՀԱՅՐԱՊԵՏԻ ՀԱՆԳԻՍԱՊԵՏՈՒԹՅԱՄԲ
ԿԱՏԱՐՎՈՒՄԷ ԱՎԱԳ ՈՒՐԲԱԹԻ ԹԱՂԱՄԱՆ ԿԱՐԳԸ



Ս. ՀԱՐՈՒԹՅԱՆ ՏՈՆԻ ՀԱՅՐԱՊԵՏԱԿԱՆ ԹԱՓՈՐԸ



Ա. ՀԱՐՈՒԹՅԱՆ ՏՈՒՆԻ ՀԱՅՐԱՊԵՏԱԿԱՆ ԻՐ ՊԱՏԳԱՄԷ Է ՀԴՈՒՄ
Ն.Ս.Օ.Տ.Տ. ԳԱՐԵԳՐԻ Ք ԱՄԵՆԱՅՆ ՀԱՅՈՑ ԿԱԹՈՂԻԿՈՍԵ



Ս. ՀԱՐՈՒԹՅԱՆ ՏՈՆԻ Ս. ՀԱՂՈՐԴՈՒԹՅՈՒՆԻ Է ԲԱՇԽՈՒՄ ՎԵՀԱՓԱՌ ՀԱՅՐԱՊԵՏԸ

